

Uttale frå mannskapet i Samnanger brannvesen i samband med prosjekt ny brannstasjon

Dei tilsette i brannvesenet har diskutert ein del rundt ny brannstasjon og me har landa på nokre punkt me meiner er vesentlege i val av plassering, samt kvifor me meiner at ny brannstasjon må byggast. Ut frå signal me har fått så er det no fire lokasjonar som skal vurderast - Frøland, Tysse, Nesodden og Lauskarmyrane. Uttalen baserar seg på desse fire lokasjonane.

Kvifor ny brannstasjon

Arbeidstilsynet sine krav til HMS er ikkje til stades i noverande brannstasjon, og denne stasjonen vil truleg heller ikkje kunne utbetrast til å imøtekome desse krava. Krava er nedfelt i Arbeidsmiljøloven, Arbeidsplassforskriften samt Forskrift om utførelse av arbeid.

<https://www.arbeidstilsynet.no/tema/byggesak/veiledning-til-dokumentasjonskrav-ved-soknad-om-arbeidstilsynets-samtykke/krav-til-fysisk-arbeidsmiljo-i-brannstasjonar/>

Plassering av ny brannstasjon

1. Brannstasjonen må plasserast slik at me når dei krav som er sett til oss gjennom “Brann- og redningsvesenforskriften” og kommunen si brannordning. Ut frå dette, og gjennom utrekningar me har gjort på utrykkingstid, vil ikkje plassering på Tysse eller Frøland vere mogleg.
2. Utanom dei absolutte krava i lovverket må ein også ta høgde for kvar me har andre risikoobjekt og bygg der det tidvis oppheld seg mange personar og/eller har stor verdi, både økonomisk og kulturelt. Skular, barnehagar, butikkar, kyrkja mm.
3. Brannstasjonen må plasserast slik at me når flest mogleg innbyggjarar på kortast mogleg tid. Ein må gjerne også sjå på kvar ein ser for seg folkeveksten i kommunen dei neste 20 åra.
4. Brannstasjonen må plasserast slik at me får ei breiast mogleg rekruttering av tilsette i brannvesenet. Igjen så er “Brann- og redningsvesenforskriften” styrande for kvar ein kan rekruttere folk frå.
5. Ein må syte for at tomte/området er stort nok til at ein kan lage eit øvingsområde i tillegg til brannstasjon og parkeringsplassar til dei tilsette sine bilar ved utrykking.

Ut frå dei lokasjonar som til no har vore snakk om så meiner me at Frøland og Tysse ikkje er aktuelle lokasjonar for ny brannstasjon, og det er såleis Nesodden og Lauskar som då står att som dei aktuelle lokasjonane. Me er i utgangspunktet positive til Nesodden då ein ny stasjon der truleg kan realiserast relativt raskt. Me har gjort nokre enkle målingar av arealet og me stiller oss litt tvilande til om det er stort nok. Det må i så fall kvalitetssikrast at det er tilstrekkeleg areal til brannstasjon, parkering og øvingsområde før ein går vidare med dette som endeleg løysing. Me er også positive til Lauskar og er innstilte på å vente til dette området er klart dersom det vert gjort midlertidige

utbetringar på noverande stasjon (slik at HMS-tilhøva vert så gode som dei kan verte der), eller at det vert sett opp ein midlertidig stasjon (stålhall og containere?), til dømes i Nesodden, i påvente av endeleg løysing på Lauskar.